

AKASHVANI AIZAWL

REGIONAL NEWS BULLETIN

HEADLINES (MORNING)

- 1. Ni hnih awh tur Mizoram Legislative Assembly fur thutkhawm chu vawiin zing dar 10.30 hian Assembly House ah tan a ni ang.
- 2. September ni 13-a Sairang leh Bairabi inkar Rel kawng hawn tur chungchangah Mizoram sorkar chu Railway Board thuneitute nen inkawmin a inbuatsaih mek.
- 3. Jammu & Kashmir- dakar 24 chhung nasa taka ruah a sur avanga chhiatna thlengah mi 10 aia tlem lo an thi.
- 4. Prime Minister Narendra Modia chuan ningani atangin Japan leh China a tlawh dawn.

<><><>

ASSEMBLY SESSION

Ni hnih awh tur Mizoram Legislative Assembly fur thutkhawm chu vawiin zing dar 10.30 hian Assembly House ah tan a ni dawn a, Session tan ni ah hian Dampa bialtu MLA Pu Lalrintluanga Sailo sunna hun hman a ni ang

Assembly Secretariat atanga thudawn danin, sorkar dan siam tur thar hi Urban Development & Poverty Alleviation (UD&PA) Department atangin The Mizoram Local Body Ombudsman Bill 2025 leh Social Welfare Department atangin kutdawh khapna dan siam tur duan - The Mizoram Prohibition of Beggary Bill, 2025 bakah The Mizoram private placement agency (amendment) bill, 2025 te chu thehluh a ni tawh a. Hei bakah hian Land Revenue & Settlement (LR&S) Department atangin dan ding lai siamthat rawtna The Mizoram Land Revenue (Amendment) Bill, 2025 leh The Mizoram private placement agency (amendment) bill, 2025 chu an dawng tawh bawk. Official Resolution pakhat a lut tawh a, hei hi Environment, Forests & Climate Change (EF&CC) Department atanga lut a ni a. Hei bakah hian assembly inkhawma tawngka a chhan chi (starred question) 350 leh ziaka chhan chi (unstarred question) 124 a lut tawh bawk a ni. Hei bakah hian Bill pakhat lut Speaker-in a la admit loh a awm a, a admit chuan a vaiin Bill 5 a lut dawn a ni.

Tun tum assembly fur inkhawm hi Assembly kal mek 9-na a inkhawm vawi 5-na tur a ni dawn a. Assembly speaker Pu Lalbiakzama hova business advisory committee (BAC) thukhawm chuan inkhawm hi ni 2 chhung vawiin leh naktuka nei turin an rel a ni.

<><><>

KOLASIB SECURITY

Kolasib District Bawrhsap Pu Robert C. Lalhmangaiha chuan Kolasib District chhunga Inner Line Permit(ILP) Check Post-te uluk zawka kalpui mek a nih thu leh sorkar hotute pawn heng Check Gate-te hi vil in an tlawh thin thu a sawi.

Nimin khan Kolasib DC Office Conference Hall-ah ‘District Level Security Meeting thutkhawm neih a ni a, meeting kaihruiatu District Bawrhsap Pu Robert C. Lalhmangaiha chuan Kolasib District chu State luhka leh ramri depa awm a nih avangin dan leh thupek kawngah inven lawk a ngaihna hrang hrang a awm thu a sawi a. DC chuan thenawm State Assam sorkar chuan tunhnaiah an ram chhunga dan lova awmte dapchhuah beihpui a thlak avangin Mizoram lama rawn luh tum an awm theih thu leh hei hian sorkar dan leh dun kenkawhna kawngah harsatna tam tak a thlen theih thu a sawi a. DC chuan ramri depa awm khawtlang hruiute leh mipuite pawh dan lova Mizorama rawn lutte venna kawnga an thawhna chu fakawm tiin sorkar hmalakna thlawp zel turin a sawm bawk a ni.

He hunah hian Kolasib District huam chhunga Police Duty Post-te leh ILP Check Post hrang hrangte dinhmun tarlan a ni a. Check Post-te inbiakpawhna leh inkalpawhna tha neih dan tur chungchang te, thawmthat a ngaihna lai te leh Police Duty Post hmun thenkhat remchang zawkna avanga a hmun sawn ngai laite sawihoin, thawktu indaihlona phuhruk dan tur sawihona neih a ni a.

Ramri depa ILP Check Post hrang hrangte pawh tih changtlun dan tur leh 4-Lane kawngpuiin Mizoram a rawn paltlang huna a ILP Check Post leh Police Check Post turte pawh sawihona neih nghal a ni a. Kolasib District huam chhunga Rail Station-a ILP Check dan turte, Railway-a Police Duty tur mamawh a nih dante ngaihthlak niin

Kolasib District huam chhunga Security lama chak zawk a hmalak a nih thei nan Police Station leh Check Post siam belh dan turte sawiho a ni bawk.

He thuthkawmah hian sorkar mi pawimawh te, Kolasib District Jt. VC aiawhte, ramri dep a VCP te, Jt. YMA aiawh te leh Kolasib Hqrs MZP hruiute an tel a ni.

(Andrew Kolasib PTC)

<><><>

SAIRANG BAIRABI RAILWAY

September ni 13-a Sairang leh Bairabi inkar Rel kawng hawn tur chungchangah Mizoram sorkar chu Railway Board thuneitute nen inkawmin a inbuatsaih mek a, rel lo lut tur hian hmasawnna nasa tak a thlen dawn nia an ngaih avangin Mizo mipuite chuan an nghakhlel tawh hle tih an sawi.

Rel kawng hawn tur chungchangah hian Chief Minister Pu Lalduhoma chuan Railway Board Chairman leh CEO, Pu Satish Kumar chu Inrinni khan a chenna inah kawmin inbuatsaihna hrang hrang an sawi dun a, Chief Minister chuan Railway lamin National Highway atanga rel kawng panna kawng an laih leivungin National Highway side drain a vur avanga harsatna chungchang sawipui bawkin, Side drain te siam tha a, concrete slab tea khuh turin a hrihl a. Railway Compensation la chin fel loh an nei nia a hriat thu sawiin a rang lama chingfel turin a lo ngen a ni.

Aizawla cheng mi hrang hrang te chuan rel kawng lo lut tur chu hmasawnna rahbi lian tak a ni tih sawiin, inkalpawhna, insumdawntawnna leh khualzin hipna lam a tih hmasawn dawn avangin state sum leh pai dinhmun chu nasa takin a thang dawn an ti a, hei bakah hian ram chhung hmun dangte nen inpawh lehzualna a thlen thei dawn avangin nghahlelhawm an tih thu an sawi a ni.

Akashvani palaiin Sairanga cheng mithenkhat a kawm kual te pawhin rel lo lut tur chu lawmawm an tih thu an sawi a, tunah pawh rel kawng leh station-ah inhlawhfakna tur te an neih phah tawh a, rel a lo luh hunah phei chuan chawhmeh te a tlawm tawh dawn nia an hriat avangin an phur hle tih an sawi a. Sairang Branch YMA President Pu Vanlalmuana pawhin rel lo lut tur chu Sairang mipuite an lawm hle tih sawiin, Mizoram pum huap pawhin bung thar a ni a, changkanna rahbi zawh tanna hun pawimawh tak nia an hriat thu a sawi.

Sairang YMA Adviser, Area MUP President ni bawk Pu B. Lalrinthanga pawhin rel lo lut chu thil tha tak leh ram hmasawnna turah an ngaih thu a sawi a ni.

Northeast Frontier Railway (NFR) siam Bairabi–Sairang New Line rel kawng hi kilometre 51.38 a thui a ni a, section 4-ah then darh niin, Bairabi–Hortoki km 16.72 a thui, Hortoki–Kawnpui km 9.71 a thui, Kawnpui–Mualkhang km 12.11 a thui leh Mualkhang–Sairang km 12.84 a thui a ni a, leiverh 48, lei lian 55, lei te 87, Road Over Bridges (ROBs) 5 leh Road Under Bridges (RUBs) 6 a paltlang a ni.

India ram zalen hnua a wawi khatna atan Aizawl dai, Sairang thleng tura Rel kawng siam hi Sorkar laipui hmalakna pawimawh, Act East Policy tihhlawhtlinna pakhat niin, inkalpawhna tha leh tlawm bakah khualzin hipna leh sum leh pai dinhmun tihhmasawn nana hmarchhak state te thlunzawm chu a tum ber a ni a. Mizoram hi Assam, Tripura leh Arunachal Pradesh dawtah hmarchhak state zinga khawpui (capital) leh rel in kalpawh thei 4-na a ni dawn a ni.

Puan tawh angin Prime Minister Narendra Modi an thla thar September ni 13 khian Sairang leh Bairabi inkar Rel kawng hi a rawn hawng dawn a ni.

<><><>

CONGRESS PR

Congress Party Thalai chuan Dampa bialtu MLA Pu Lalrintluanga Sailo Assembly House-a sunna hman anih hmaa helai biala an Candidate tur ZPM in a puang chu midang zahlohna a ni an ti.

MPYCC hian thuchhuah siamin, hetiang inthlan that tur anih thu sorkar thuneituten an chhuah hmaa Candidate an puang ta mai hi ZPM Party-in pawisak an neih lohzia leh midang an zah lohzia an nemnghetah an ngai tih an sawi a, Mizoram chhungah MLA By-election wawi engemaw zat neih a lo ni tawh a. Thihna avanga inthlan that a nih tum phei chuan eng party mahin inthlan buaipuitu Election lamin inthlan that tur thuchhuah an neih hmain Candidate an puang ngai lo an ti.

Tun hnai lawk kum 2021 a Tuirial bialtu ZPM MLA Pu Andrew H. Thangliana a boral tum pawhin Election lamin inthlan that a nih tur thu an puan hmain eng party mahin Candidate an puang lo an ti a. Hei hi MLA te zahawmna leh bial mipui tawrhpuina zahawm takah Congress thalai chuan a ngai a ni, an ti.

Congress Thalai thuchhuah ah chuan ZPM Party-in an Candidate atana an puan tak Pu Vanlalsailova'n inthlan senso phuhruk ngei a tum thu a sawi pawh Dampa bial mipui tan thil hlauhawm leh mahni inhaivur tumna, bial tana MLA inngah ngamna tlakah Congress Thalai chuan a ngai lo an ti bawk a ni.

(PR)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

J&K

Jammu & Kashmir- dakar 24 chhung nasa taka ruah a sur avanga chhiatna thlengah mi 10 aia tlem lo an thi.Tuilianin hmun hniam lai a chim a, lui lianin hlauhawm chhinchhiahna a pel tawh bawk a. Kawlphetha leh internet pekkualnaah harsatna a thleng mek a. Vawiin atangin emergenct service tihloh sawrkar hnathawhna hmun zawng zawng khar a ni ang. Sakhaw biak zinte kalna Mata Vaishno Devi shrine kawnga leimin avangin mi 6 an thi a, mi 18 in hliam an tuar a. He kawng hi khar chhunzawm a ni a. Chhanchhuah hna ngawrh takin thawh mek a ni a. Dada district-a hmun hrang hranga chhiatna thlengah mi 4 aia tlem lo an thi a, in leh lo tam tak a chhe bawk a ni.

Hetihlai hian Indian Meteorological Dept. chuan ramchhung hmarthlang, central leh khawchhak lamahte ni 4-5 chhung chu ruah a la sur nasa dawn tih a sawilawk a. Chhatisgarh, Maharastra leh Odisha ahte chuan vawiinah nasa takin ruah a sur rin a ni a. Heng bakah hian ramchhung hmarlam, hmarthlang lamte, Arunachal Pradesh, Assam, Meghalaya, Coastal Andhra Pradesh, Rajasthan, Gujarat, Karnataka, Kerala leh Mahe, Konkan leh Goa ah te ruah a sur nasa dawn tih a sawi lawk a ni.

(Newsonair)

<><><>

PM

Prime Minister Narendra Modia chuan ningani atangin Japan leh China a tlawh dawn. Japan ah hian ni hnih chamin tun thla ni 29 leh ni 30 chhung a awm ang a. India-Japan Anuual Summit vawi 15 na a hmanpui dawn a ni. Foeign Secretary Vikram Misri chuan tun tum hi Prime Minister Modian Japan a tlawh vawi 8 na tur a ni a. India leh Japan inkara thil pawimawh tak tak ngaihtuahho a ni ang a ti.

Hemi hnu hian China tlawh lehin Shanghai Cooperation Organisation meeting vawi 25 na tun thla ni 31 leh thlaleh ni 1 a neih turah a tel leh ang.

(Newsonair)

<><><>